

1 TESALONIKA

Warage Codoi o Ayeedek Pól Ol o Joowo Abaak Tesalonika

1 ¹ Aneeta Pól, ki Silas, been Timozi. Kayeedekun warage nico igeet ol o ceez o Joowo kuture o kazi Tesalonika o atuyu Jook ween baatina been Manyi Yesu Kiristo. Abon bai ganoni ki deten abil ngaatunoon.

Atal Pól ol o atuwe

² Goon tup noko kanyeka naaga Jook zany ngaaten igeet dook, ma kaadanun igeet nyariinowe ogaacak. ³ Goon kaadana nume o Jook ween baatinai liŋliŋon unoon tuwento, ki liŋliŋon unoon reezonto, kibeen tuwen unoon adoi areyu badaan o Yesu Kiristo.

⁴ Dól o yaai tuwento, kagaya naaga areezun igeet Jooi, ma eŋerawun niini igeet iziti ol cigin. ⁵ Eeci waanbaal kanyaakun naaga igeet kaviyak o Joowo abon e, alaŋ waanice kavunakun naaga igeet olla zooze cinaan doon. Bar kanyaakun waanice kaviyak nicoko doyiye o Joowo been Vŋjize onin, ma agawutu niiga kaviyawa nicigi kaviyak ceen didi. Ma buk agayu niiga baayizi onaan kabaaka ngaatunoon baayiz ci abon. Zin waanice kagoona naaga noko o, ka buk ojoktu niiga bonat. ⁶ Ayayiztetu buk waanice niiga ageeta been Manyi Yesu. Mayo nuun apirnanu niiga ɔɔɔt giye o amarninun ol igeet tuwente unoon o, agamtawu waanice niiga kaviyak o Yesu talniinta doyiye o Vŋjiz onin. ⁷ Makacin izitu niiga yabziin ci abon ole o atuwe dook looce o Masidoniya been Akaya. ⁸ Alaŋ een zin njinaante doon, bar buk kaviyawa o tuwen unoon adala viten dook. Akom zin buk naaga gi ci ka kuduktawa zooze nico. ⁹ Eeci ol nicigi dook aduwaket ageeta talnaan baal atalnanetu niiga ageeta waanbaal kavunakun igeet e, kibeen gi o utuntu niiga joowane o adilyai. Ma ivita ilinliŋtozeyu Jook ween didi. ¹⁰ Aduwaket buk niigi ageeta reewinet unoon areyu niiga ŋeerin Yesu Kiristo o ka kiiya tamma. Nɔɔɔn neen baal iŋaani Jooi nɔɔɔn daayiza e, ka korogozet niini ageet bornet noŋe o Joowo.

Liŋliŋon o Pól Tesalonika

2 ¹ Dól o yaai tuwento, agayu ri niiga keroni onaan baal kavoya ngaatunoon e, alaŋ een gi ci labak. ² Agayu niiga baale iŋaan kivitayun naaga igeet kuture unoon Tesalonika e, rak kigidewa ma kadmima kuture o kazi Vilipiya. Bar zin Manyi ona anyet waanice ageeta moozet ci kaduwakun igeet kaviyak ogin abon. Mayo nuun waanice amarninet ol ci meel ɔɔɔt ageeta e, kamenana naaga labak. ³⁻⁴ Ma zɔɔɔ ci baal kavɔ kademezun naaga igeet neke, alaŋ een vɔlɔŋ ci ka kalabtaya ol, eeci agayet Jooi ageeta kabonana, ma anyet niini ageeta zɔɔɔ onin abon ka kuduktaya naaga ol jurun gole o arɔɔŋ niini. Alaŋ zin naaga karoonyaa kanyceya talniin ol ci deer, bar karoonyaa kanyceya talniin Jook o aga zinzeeti ogaacak. ⁵ Agayu ri niiga ɔɔɔt eŋe alaŋ waanice kavunakun naaga igeet ka kivita kuduktayun igeet zoozok ci amadi vɔlɔŋa, ma buk aga Jooi ŋaan kivita kulutun naaga igeet zinzeetine ci appintik, ka kojoktawa guruc. ⁶ Ma ŋaan buk kɔɔɔŋta titinyon ngaatunoon, karabon een ole ogen. ⁷ Ma giye o keegina naaga toonnya o Yesu Kiristo, agano waan ŋaati kajinun naaga igeet kaal ci karoonyaa, bar zin ŋaan kutuguza noko, ma kazuunun igeet, kiyo goon azooni ŋaa dól ogin o. ⁸ Ma giye o kareezun naaga igeet ɔɔɔt, karoonyaa waanice ɔɔɔt eŋe kozolit kibeen igeet kaviyak o Joowo abon. Bar zin alaŋ karoonyaa kozolit been igeet kaviyak doon, bar buk karoonyaa kitiritun naaga igeet zinzeetine ogaacak dook. ⁹ Dól o yaai tuwento, agayu ri niiga liŋliŋon baal kalinliŋnya naaga ɔɔɔt ngaatunoon e. Kalinliŋnya goon waanice naaga waazinok ki baalinok ŋaati kalolana ceezi ween rumane, eeci alaŋ karoonyaa kipirtayun igeet iitene baal kavɔ kademzekun igeet kaviyak o Joowo abon e.

¹⁰ Kabaaka waanice naaga ngaatunoon igeet o atuwenu baayiz ci abon, kɔkɔm gi ci ger kabacana. Agayu ri niiga alya zɔɔɔ nici alaŋ een vɔlɔŋ, ma buk aga Jooi. ¹¹ Agayu niiga kagoonun waanice naaga igeet kiyo goon agoon eeti dól ogin o. ¹² Kadizkekun waanice igeet, ma kilotun, ma kilalekun ka utuguz kaal o atal Jooi o awuyun igeet ka ozolit ki nɔɔɔn baliin onin ki titinyon onin.

¹³ Goon tup noko kanaata naaga Jook, eeci iinyaye baal kavɔ kuuwayekun igeet zɔɔɔ o Joowo e, agamtawu. Ma agawutu niiga didi zɔɔɔ nica alaŋ aku eete ci deer, bar aku Joowa, eeci zɔɔɔ nico neen o anyun igeet o atuwenu utuguz kaal ci abon. ¹⁴ Dól o yaai kareezun, igidun baale igeet ol o abaawonu, kiyo buk agit ol o Juz gɔnɔgi o tuwento abaak Judiya o. ¹⁵ Ol o Juz neen baal aruk Manyi ona Yesu Kiristo ki nyakananet, ma agidet ageeta. Agoon niigi kaal calan atal Jooi, ma amarnin niigi ol dook. ¹⁶ Arɔɔŋ niigi kalamtet ageeta ŋaati kademzeka moden zɔɔɔ o rogeto. Zin giye nico ŋaan azaac niigi oŋe ugeec noko. Inoko zin ŋaan apayek Jooi nɔɔɔn gerzitin.

Arɔɔŋ Pól kook kicin bor o Joowo bodo

¹⁷ Dól o yaai tuwento, iiten baal kaŋerɔn e olla kaavtiya ŋintimiliny noko, bar aadawun zinzeeti ogaacak igeet ɔɔɔt eŋe, ma katamana goon lak ci meel ger gɔl ci karoonyaa kɔɔt kicintun igeet ɔɔɔt. Bar alaŋ kajowana gɔl. Kaŋerɔ zin eleetine doon, maje baabani ci zinzeeti ogaac adoye. ¹⁸ Karoonyaa goon naaga kivitayun igeeta. Naanallya Pól karoonyaa kiiya kicinun igeet lak ci meel ger, bar olla alamnyan Loryenti doon. ¹⁹ Igeet neen o anyaketu ageeta titinyon ki talniin been bolɔlɔn inoko o been iitene ci katin abadaan Manyi Yesu e. ²⁰ Didile anyaketu niiga ageeta titinyon ci katalnina naaga ɔɔɔt eŋe.

3 ¹⁻² Mazin giye o aburni ageeta zinzeeti ɔɔɔt ngaaten igeet, kitoonteyun naaga igeet Timozi ween gotona ona, ma een gabaren ci Joowo uuwak zɔɔɔ onin abon o akati Yesu. Maje naaga ol ogene kacina abon kaavtiya kuture o kazi Atinas o ŋaato. Kitoontekun zin naaga nɔɔɔn igeet ka kook kanyek niini zinzeeti ugooc kodoyit, ma adizkekun igeet, ka calan oonnu niiga tuwen unoon giye o agidenu. ³ Anyek zin zinzeeti kodoyit, eeci agayu niiga piryakzet akunaket ageet ol o tuwento dook. ⁴ Iitene baal karomen ki igeet e, kuduktayun rak naaga igeet kanekun ne, “Akunaket tinjeere piryakzet.” Ma agayu niiga didi gi ci inoko agooni noko gi baal kaduwaku e eŋe neen. ⁵ Kitoonekun zin Timozi ka kook kicin tuwen unoon mā ŋaan adoi, eeci aviryany aneet ziniz, ma kabaaban kazi ne, “Coma icinawun Loryenti, ma anyceyu demziin onan ngaatunoon kizi gi ci labak.”

⁶ Inoko zin abadayet Timozi ageeta ŋaato, ma iiya uduwayet zɔɔɔ o akati tuwen unoon been reezonet unoon. Buk iiya uduwayek niini ageeta gi o aadanetu niiga ageeta tup kiyo buk goon kabaabanun naaga igeet o. ⁷⁻⁸ Dól o yaai tuwento, inoko alalit ageeta zinzeeti ɔɔɔt eŋe, eeci kiziiika naaga tuwen unoon. Mayo nuun kanyaka kaal ci meelik apirnanet o, anycetun niiga ageeta talniin. ⁹ Kanaata zin naaga Jook ɔɔɔt eŋe giye o anycetun niiga talniin. ¹⁰ Kalaya goon naaga Jook waazin ki baalin ɔɔɔt ka kimiirtozeyun naaga igeet ka koota kazaaceyun igeet tuwen unoon zoozowe ogen bodo. ¹¹ Abon bai Jooi ween baatinai alye onin been Manyi

onai Yesu akolaket gól ci kavoya ñaatunooñ. ¹² Abon bai Manyi Jooi anyuñ igeet ele kibeem ol dook ereezto ɔɔɔt kiyo buk kareezuñ naaga igeet o. ¹³ Ma gole nico anyaku tiñeere niiga ðoyiz ki bonat ñume o Jook ween baatina iitene ci abadaan Manyi onai Yesu been ol ogin dook e.

Baayiz ci ol o atuwe

4 ¹⁻² Gotonnga, inoko kilalekuñ igeet zaare o Manyi Yesu ka abaayit baayiz ci abon atalna Jooi kiyo baale acinu niiga ñaatinaañ e. ñejet inoko abaaktu baayiz ci abon, olla zin kadizkekuñ igeet ka emedak baayiz ci abon noko noko. ³ Arooñnyuñ Jooi igeet ɔɔɔt ele obonta ñume onin. Edeya eleeti wañzeta. ⁴ Ma abon arocinu niiga gole ci abon, akom wañzeta. ⁵ Alañ abon ñaati arocinu giye ci olla arooñnyu niiga reecanzet kiyo gɔɔn agɔɔn ol o alañ atuwe o. ⁶ Má adomanu zoocmazit ñaane culu, eeci abor Jooi gi nico ɔɔɔt. Kuduktayuñ rak baale igeet zoozok nicoko. Apirnané Jooi waanma ol o agɔɔn oñe nicoko ɔɔɔt ele. ⁷ Alañ awanet Jooi ageet ka kivita kutuguz wañzet. Bar awanet niini ageet ka kabaayit baayiz o abon aroñ niini. ⁸ Ma eeti ci abor demziin nico, alañ abor demziin ci ol ci deer, bar abor niini demziin o Jook o anyet ageet Vɔñiz onin ka kobontai kiyo niini o. ⁹ Alañ karoñ naana keteyeedeeyuñ igeet zɔɔz ci akati reezonet, eeci kagaya naaga areezonu niiga ɔɔɔt giye o edemezekuñ Jooi igeet reezonet ci ka ereezoi. ¹⁰ Ma didi ereeztu niiga ol o atuwe dook lɔci o kazi Masidoniya dook. Kilalekuñ zin naaga igeet gotonnga, ka ereezto ɔɔɔt kujuk nico. ¹¹ Iricanit gi ci abaaku baayiz ci ajañani. Iricanit buk liñliñon. Iliñliñit azeene ugooc ele kiyo baale kaduwakuñ e. ¹² Má agoonu noko, atitinyuñ koca ol o alañ atuwe igeet, ma alañ buk koca niiga arooñnyu tirten ole ogen.

Badaan o Manyi Yesu

¹³ Dól o yaai, inoko karoñnyuñ igeet agaac gi ci akati ol o atuwe baal adaayito e juruñ, ka gɔɔn te má anyak eet ci adaai, ka calañ aluyu kiyo ol o alañ aga ñaazi o ñaani ol daayiza o. ¹⁴ Kaga naaga didi Yesu adaak, ma bodo itina daayiza, ma giye nico kaga buk naaga abadaan tiñeere Jooi nɔɔnɔ kibeem ol o tuwento baal adaayito e dook daayiza. ¹⁵ Anyetu zin kuduktayuñ igeet demziin baal aduwa Manyi Yesu ce. Katin iitene ci abadaan Manyi Yesu e, naaga ci ñaan karogi o alañ karaki ole o adaayito. ¹⁶ Ma iitene nice abee toromba o Joowo, ma agereny alaani o toonnyak o Joowo. Iiya ni Manyi Yesu Kiristo niini alya tamma. Itiñgazo ni rak ol o tuwento baal adaayito e korogit. ¹⁷ Enico naaga o ñaan karogi iitene nice karomonek nɔɔgo ñaatodoi, ma kavo karumɔ naaga dook ki Manyi diizoca tammu keña. Kɔɔt ni kabaayit naaga ki Manyi Yesu tamma noko been neen. ¹⁸ Abon zin gɔɔn ilotonu, ma adizkonu niiga dook zoozowe nicoko.

Iziti vilile badaante o Yesu

5 ¹ Dól o yaai tuwento, alañ naana karoñ keteyeedeeyuñ igeet nyelowe karabon een irkitok ci ka katin kakatai kaala nicigi. ² Eeci agayu niiga ɔɔɔt iitene o badaan o Manyi Yesu aku katin boyoñyoñ kiyo gɔɔn aku agoryaiti baal o. ³ Ma iinyaye ci ka kabadai Yesu neke atalne katin ol labak anɔ ne, “Amadi lɔci.” Bar zin enice atoroban nɔɔgo noña ci targany kiyo gɔɔn atoroban ñaa dole aaminta o. Ma akom bodo nɔɔgo gól ci ka korogozti eleeti. ⁴ Dól o yaai tuwento, má abaaku niiga kiyo ol o ñaan abaak muura o zee makacin otorobanuñ iitene nica kiyo agoryaiti o. ⁵ Eeci eeginu niiga ol ci vooritin o waazinu. Alañ naaga keegin ol ci muur o baalinu. ⁶ Zin naaga alañ abon ñaati koogine kiyo ol o alañ atuwe o. Bar abon keegin vilile, ma kabek gól. ⁷ Ma ol o ñaan abaak muura alañ niigi vilile, ma abaaki labak. ⁸ Bar zin naaga o kabaak vooritina, abon kageny eleetine ogaac. Kanycek tuwen ki reezonet been rewinet onai karewi Manyi kizi kilibwa cigaac. ⁹ Alañ añerant Jooi ageet ka kook kapayeyet gerzitin, bar aroñeket niini ageet roget ñaaten Manyi onai Yesu Kiristo. ¹⁰ Iiya niini adaak giye cinai. Mayo nuun kadaai naaga karabon karogi iiten ci abadaan niini e, ñaan ni kavo kabaak naaga been nɔɔnɔ ñaatodoi baayiz o abil been neen. ¹¹ Mazin giye nico abon adizkonu niiga maany, ma atirtonu kiyo agoonu noko.

Zoosok o ka koñorei

¹² Dól o yaai tuwento, inoko kilalekuñ igeet abon atitinyu ol o añera Jooi ka kedemeztuñ igeet. ¹³ Ititinyit niiga nɔɔgo ɔɔɔt reezinta giye ci akati liñliñon o agɔɔn niigi. Abaayit niiga dook yaak kɔkɔm yɔwɔn.

¹⁴ Dól o yaai tuwento, itiloz ol o adaai eleeti ñaatunooñ. Idiziktek ol o dalaan been ol o kidic tuwen. Anyayit zinzeeti laliz ole dook. ¹⁵ Má acacanu kaal o ger agoonekuñ ol igeet been neen, bar tup noko utuguzo kaal ci abon niiga maany been buk ol dook.

¹⁶ Ataltɔ iinya dook. ¹⁷ Añaruyɔ iinya dook. ¹⁸ Anaatit Jook kaale o abon been buk kaale o ger avunakuñ igeet dook, eeci nicini gi o aroñ Jooi ñaatunooñ ol o atuyu Yesu Kiristo neen.

¹⁹ Má alamnyu liñliñon o Vɔñiz o Joowo. ²⁰ Buk má apezu uuwayi o kaal o ka kiitazo. ²¹ Atañamtek zoosok o aduwa ol dook juruñ, ka uzuuti zoozowe nicoko ci abon ñaatineñ. ²² Edeya eleeti kaale o ger dook.

²³ Abon bai Jooi o anyak ganon anyuñ igeet obonta golowe dook. Ma azoonuñ niini igeet eleeti ugooc, ki zinzeeti ugooc, been roget unooñ kɔkɔm oñe iitene ci akuni Manyi onai Yesu Kiristo e. ²⁴ Zin niini o otowawuñ igeet ñaan agɔɔn kaal nicoko, eeci má aduwa niini zɔɔz cin, alañ bodo owo.

²⁵ Dól o yaai, ijinteyetu Jook ka kitiritet ageeta buk.

²⁶ Azaayeyetu dól o yaatigaac dook ñinaante ɔɔɔt. ²⁷ Karicanekuñ naana igeet zaare o Manyi Yesu ka ekeebtek warage nico ol o tuwento dook ñinaante. ²⁸ Abon bai deteni o Manyi onai Yesu Kiristo aavi ñaatunooñ.